



Republika e Kosovës
Republika Kosovo - Republic of Kosovo
Kuvendi - Skupština - Assembly

Ligji Nr. 05/L -015

PËR LETËRNJOFTIM

Kuvendi i Republikës së Kosovës;

Në bazë të nenit 65 (1) të Kushtetutës së Republikës së Kosovës,

Miratton

LIGJ PËR LETËRNJOFTIM

KAPITULLI I
DISPOZITAT E PËRGJITHSHME

Neni 1
Qëllimi

Ky ligj përcakton kushtet, procedurat dhe organin kompetent për lëshimin, dhe përdorimin e letërnjoftimit nga shtetasit e Republikës së Kosovës.

Neni 2
Përkufizimet

1. Shprehjet e përdorura në këtë ligj kanë këtë kuptim:

1.1. **Letërnjoftim**- dokumenti i identifikimit i cili përmban të dhënat personale në formë fizike dhe elektronike, i cili i lëshohet shtetasit të Republikës së Kosovës për të vërtetuar identitetin dhe shtetësinë e bartësit të dokumentit;

1.2. **Shtetas i Republikës së Kosovës** - personi i cili e ka shtetësinë e Republikës së Kosovës, në pajtim me Ligjin për Shtetësinë;

1.3. **Organi kompetent**- Ministria e Punëve të Brendshme;

1.4. **Ministri**- Ministri i Ministrisë së Punëve të Brendshme”.

1.5. **Të dhënat biometrike** -janë të dhëna unike që paraqesin karakteristikat unike të individit dhe shërbejnë për të përcaktuar identitetin përmes pamjes së fytyrës (portretit), shenjave të gishtërinjve, ngjyrës së syve dhe nënshkrimit elektronik;

1.6. **Vendbanimi** - vendi në të cilin qytetari vendoset me qëllim që të jetojë përgjithmonë;

1.7. **Çip**- pajisje elektronike e vendosur në letërnjoftim, në të cilën në formë elektronike janë të vendosura të dhënat e bartësit të letërnjoftimit;

1.8. **Certifikatë elektronike**- vërtetimi elektronik, që lidh të dhënat kontrolluese të nënshkrimit me një person dhe konfirmon identitetin e atij personi;

1.9. **Nënshkrimi elektronik**- të dhënat në formë elektronike, të cilat u bashkëngjiten ose shoqërojnë logjikisht porosinë e të dhënave, dhe që mund të përdoren për të identifikuar nënshkruesin në lidhje me porosinë e të dhënave;

1.10. **Autoriteti certifikues** – autoriteti në kuadër të ministries që i lëshon certifikatat elektronike të vendosura në çipin e letërnjoftimit;

1.11. **Ofruesi i shërbimeve elektronike**- ndërmarrja/institucioni publik ose privat që ofron shërbime elektronike duke përdorur letërnjoftimin;

1.12. **Certifikata e autorizimit**- certifikatë elektronike e cila i lëshohet ofruesit të shërbimeve për ti mundësuar qasjen elektronike në të dhënat elektronike në letërnjoftim në mënyrë të sigurt;

Neni 3

Pajisja me letërnjoftim dhe posedimi i letërnjoftimit

1. Çdo shtetas i Republikës së Kosovës nga mosha gjashtëmbëdhjetë (16) vjeçare, është i detyruar të pajiset me letërnjoftim.

2. Shtetasi nuk mund të posedojë me shumë se një letërnjoftim të vlefshëm të lëshuar në Republikën e Kosovës.

Neni 4

Përdorimi i letërnjoftimit dhe detyrimet e shtetasit

1. Shtetasi është i detyruar të ketë letërnjoftimin me vete, dhe me kërkesën e personit zyrtar të autorizuar me ligj, është i detyruar që t’ia japë letërnjoftimin për identifikim.

2. Shtetasi nuk ka të drejtë t’i japë letërnjoftimin e vet personit tjetër për përdorim apo ta

përdorë letërnjoftimin e personit tjetër si të vetin.

3. Letërnjoftimi i shtetasit tjetër nuk lejohet të përdoret me qëllim të sigurimit të ndonjë përfitimi apo të drejte, për vete ose një personi tjetër fizik ose juridik.

4. Letërnjoftimi mund të shërbejë si dokument udhëtimi për kalimin e kufirit shtetëror, në qoftë se kjo është e rregulluar me marrëveshje ndërmjet shteteve.

5. Letërnjoftimi mund të përdoret nga shtetasi për kryerjen e shërbimeve elektronike.

KAPITULLII KOMPETENCA PËRLËSHIMINE LETËRNJOFTIMIT

Neni 5

Organi kompetent për lëshimin e letërnjoftimit

1. Letërnjoftimi është prone e Republikës së Kosovës.
2. Lëshimi, procesimi, personalizimi dhe shpërndarja e letërnjoftimit behet nga organi kompetent.
3. Shtetasit e Republikës së Kosovës mund të pajisen me letërnjoftim në misionet diplomatike dhe konzullore të Republikës së Kosovës.
4. Certifikatat elektronike të vendosura në çipin e letërnjoftimit dhe certifikatat autorizuese për ofruesit e shërbimeve elektronike lëshohen nga autoriteti përkatës në kuadër të minsitrisë.
5. Çështjet që kanë të bëjnë me autoritetin certifikues dhe autorizimet e ofruesve të shërbimeve do të rregullohen me akt nënligjor nga Ministri.

Neni 6

Nënshkrimi elektronik

Nënshkrimi elektronik në letërnjoftim është i rregulluar me Ligjin për Shërbimet e Shoqërisë Informatike.

Neni 7

Shfrytëzimi i të dhënave elektronike nga letërnjoftimi

1. Të dhënat elektronike në letërnjoftim mund të shfrytëzohen vetëm nga:

1.1. Autoriteti i përcaktuar për verifikim të indetitetit, dhe

1.2. Ofruesit e shërbimeve elektronike të cilët janë të pajisur me certifikata të autorizimit.

2. Të dhënat elektronike, ndërmarrjet/ institucionet publike ose private mund ti përdorin vetëm për verifikim të identitetit.

3. Të dhënat nga paragrafi 1 dhe 2 të këtij neni duhet të përdoren në pajtim me Ligjin për Mbrojtjen e të Dhënave Personale.

Neni 8

Forma dhe mënyra e punimit të letërnjoftimit

Forma dhe mënyra e punimit të letërnjoftimit përcaktohet me akt nënligjorë nga Ministri.

Neni 9

Përmbajtja e letërnjoftimit

1. Letërnjoftimi përmban të dhënat si në vijim:

- 1.1. Stemën e Republikës së Kosovës;
- 1.2. Emrin e shtetit;
- 1.3. Emrin e dokumentit;
- 1.4. Simboli i dokumentit elektronik (biometrik);
- 1.5. Mbiemrin;
- 1.6. Emrin;
- 1.7. Datën e lindjes;
- 1.8. Gjininë;
- 1.9. Shtetësinë;
- 1.10. Datën e skadimit
- 1.11. Vendin e lindjes;
- 1.12. Fotografinë;
- 1.13. Nënshkrimi;
- 1.14. Numri i qasjes në kartelë (NQK);
- 1.15. Data e lëshimit;
- 1.16. Organin që e lëshon;

1.17. Numrin personal;

1.18. Numrin e letërnjoftimit;

1.19. Vendbanimin;

1.20. Zona e leximit me makinë (ZLM).

2. Letërnjoftimi përmban çip-in, në të cilin përveç të dhënave nga paragrafi 1 i këtij neni janë të ruajtura edhe:

2.1. Gjurmët e gishtërinjve;

2.2. Adresa e vendbanimit; dhe

2.3. Certifikatat elektronike.

Neni 10 **Shtypja e formularëve dhe letërnjoftimeve**

1. Formularët dhe letërnjoftimet shtypen në pajtim me Ligjin për Përdorimin e Gjuhëve.

2. Formularët dhe letërnjoftimet për pjestarët e komuniteteve jo shumicë shtypen edhe në gjuhët e tyre të cilat janë në përdorim në nivel lokal.

KAPITULLI III **VLEFSHMËRIA E LETËRNJOFTIMIT**

Neni 11 **Afati i vlefshmërisë së letërnjoftimit**

1. Letërnjoftimi lëshohet me afat vlefshmërie prej dhjetë (10) viteve.

2. Për personat e moshës gjashtëmbëdhjetë (16) deri në njëzetegjashtë (26) vjet letërnjoftimi ju lëshohet me afat vlefshmërie prej pesë (5) viteve.

Neni 12 **Pavlefshmëria e letërnjoftimit**

1. Përrjashtimisht nga neni 11 i këtij ligji letërnjoftimi është i pavlefshëm në rastet vijuese:

1.1. me vdekjen e personit;

1.2. me humbjen e shtetësisë së Republikës së Kosovës;

- 1.3. nëse shtetasi e bën ndërrimin e të dhënave;
- 1.4. në rast të humbjes, vjedhjes apo dëmtimit;
- 1.5. me kalimin e afatit të vlefshmërisë.

KAPITULLI IV PROCEDURA PËR PAJISJE ME LETËRNJOFTIM

Neni 13 Kërkesa për letërnjoftim

1. Shtetasi e paraqet personalisht kërkesën për tu pajisur me letërnjoftim, në organin kompetent.
2. Shtetasi nga paragrafi 1 i nenit 3 të këtij ligji, si dhe shtetasit të cilit i ka skaduar afati i vlefshmërisë në letërnjoftim, duhet të parashtroj kërkesë për pajisje me letërnjoftim brenda pesëmbdhjetë (15) ditësh.
3. Shtetasit më të rinj se tetëmbdhjetë (18) vjet, si dhe shtetasit që nuk kanë zotësi veprimi, në momentin e paraqitjes së kërkesës duhet të jenë të shoqëruar nga përfaqësuesi ligjor.
4. Shtetasit më të rinj se tetëmbdhjetë (18) vjet të cilët a kanë fituar zotësinë juridike të veprimit mund të paraqesin personalisht kërkesën për tu pajisur me letërnjoftim në organin kompetent.
5. Organi kompetent i lëshon parashtruesit të kërkesës dëshminë mbi pranimin e kërkesës.
6. Procedurat për pajisje me letërnjoftim, përcaktohen me akt nënligjor nga Ministri.

Neni 14 Lëshimi i letërnjoftim

1. Organi kompetent është i detyruar të lëshoj letërnjoftimin, brenda pesëmbdhjetë (15) ditësh nga dita e paraqitjes së kërkesës.
2. Letërnjoftimi i dorëzohet shtetasit nga organi kompetent sëbashku me të dhënat konfidenciale për përdorimin e formës elektronike të letërnjoftimit.
3. Nëse shtetasi nuk e tërheqë letërnjoftimin brenda gjashtë (6) muajsh, letërnjoftimi i kthehet organit kompetent.
4. Përjashtimisht nga paragrafi 3 i këtij neni në raste të arsyeshme afati për tërheqjen e letërnjoftimit mund të zgjasë për një kohë të arsyeshme, por jo më gjatë se dymbëdhjetë (12) muaj.

Neni 15
Dëmtimi humbja apo vjedhja e letërnjoftimit

1. Dëmtimin e letërnjoftimit, shtetasi duhet ta lajmërojë në organin kompetent brenda tetë (8) ditëve, duke bërë përshkrimin e rrethanave të dëmtimit të letërnjoftimit.
2. Dëmtimin, e letërnjoftimit jashtë vendit, shtetasi duhet që brenda tetë (8) ditëve pas hyrjes në Republikën e Kosovës, ta lajmëroj organin kompetent në mënyrën e përcaktuar nga paragrafi 1 i këtij neni.
3. Humbjen apo vjedhjen e letërnjoftimit, shtetasi duhet ta lajmëroj në stacionin më të afërt policor brenda tetë (8) ditëve, duke bërë përshkrimin e rrethanave të humbjes apo vjedhjes së letërnjoftimit.
4. Humbjen apo vjedhjen e letërnjoftimit jashtë vendit, shtetasi duhet që brenda tetë (8) ditëve pas hyrjes në Republikën e Kosovës, ta lajmëroj në stacionin më të afërt policor në mënyrën, e përcaktuar nga paragrafi 3 i këtij neni.

Neni 16
Ndërrimi i letërnjoftimit

1. Shtetasi duhet që brenda pesëmbdhjetë (15) ditëve të bëjë kërkesën për ndërrim të letërnjoftimit nëse:

- 1.1. ndërron të dhënat personale nga paragrafi 1 i nenit 9 të këtij ligji;
- 1.2. fotografia nuk tregon më pamjen e tij të vërtetë;
- 1.3. letërnjoftimi është dëmtuar;
- 1.4. letërnjoftimi përmban të dhënat e pasakta.

KAPITULLI V
EVIDENCAT

Neni 17
Evidenca e kërkesave të pranuar dhe letërnjoftimeve të lëshuara

1. Evidencën mbi kërkesat e pranuar dhe letërnjoftimet e lëshuara ruhen në formë fizike dhe elektronike nga organi kompetent.
2. Evidenca nga paragrafi 1 i këtij neni, përmban:
 - 2.1. të dhënat nga paragrafi 1 i nenit 9 të këtij ligji;
 - 2.2. datën e lëshimit të letërnjoftimit;

2.3. afatin e vlefshmërisë së letërnjoftimit;

2.4. numrin serik të regjistrimit të letërnjoftimit;

2.5. të dhënat për letërnjoftimet e dëmtuara, të humbura, të vjedhura dhe të shpallura të pavlefshme;

2.6. të dhënat nga paragrafi 1 i nenit 21 të këtij ligji.

3. Të dhënat nga evidencat ministria i ruan pesë (5) vite pas pushimit të vlefshmërisë së letërnjoftimit dhe pastaj trajtohen sipas Ligjit për Arkivat Shtetërore.

4. Të dhënat për ndalimin e përdorimit të letërnjoftimit për kalimin e kufirit shtetëror ministria i shkatërron pas pesë (5) viteve, kur kalon arsyeja për këtë ndalesë.

Neni 18

Përdorimi i të dhënave nga evidencat

Institucionet shtetërore varësisht nga autorizimi i përcaktuar me ligj, mund t'i përdorin të dhënat nga evidenca për letërnjoftimet e lëshuara në pajtim me Ligjin për Mbrojtjen e të Dhënave Personale.

KAPITULLI VI

MBIKËQYRJA

Neni 19

Mbikëqyrja

Mbikëqyrjen për zbatimin e dispozitave të këtij ligji e bënë ministria.

KAPITULLI VII

DISPOZITAT NDËSHKIMORE

Neni 20

Ndëshkimet

1. Bartësi i letërnjoftimit i cili brenda pesë (5) viteve humb, dëmton apo i është vjedhur letërnjoftimi më shumë se dy herë, letërnjoftimi i lëshohet në kohëzgjatje prej një (1) viti.

2. Dispozita nga paragrafi 1 i këtij neni nuk zbatohet, nëse shtetasi, të cilit i është vjedhur letërnjoftimi, paraqet dëshmi që vjedhja është lajmëruar si vepër penale.

Neni 21
Ndalesa e përdorimit të letërnjoftimit

1. Personi të cilit i është ndaluar largimi jashtë vendit, nuk mund ta përdorë letërnjoftimin për këtë qëllim gjatë afatit të ndalimit.
2. Lidhur me ndalesën vendos vetëm gjykata e cila njofton ministrinë.
3. Ankesa kundër vendimit nga paragrafi 2 i këtij neni nuk e ndalon ekzekutimin e tij.
4. Pas pushimit të arsyeve për ndalesën e përdorimit të letërnjoftimit për kalimin e kufirit shtetëror gjykata nga paragrafi 1 i këtij neni duhet ta lajmëroj menjëherë ministrinë.

Neni 22
Gjobat

1. Me gjobë prej njëzet (20) Euro dënohet shtetasi:
 - 1.1. i cili nuk parashtron kërkesën për pajisje me letërnjoftim të përcaktuar në paragrafin 2 të nenit 13 të këtij ligji;
 - 1.2. i cili nuk ia dorëzon organit kompetent letërnjoftimin në afatin e caktuar në paragrafin 1 të nenit 16 të këtij ligji;
 - 1.3. i cili në afatin e caktuar me ligj dhe në mënyrë të rregullt nuk e lajmëron organin kompetent për humbjen apo gjetjen e letërnjoftimit, paragrafi 3 dhe 4 i nenit 15 të këtij ligji.
2. Me gjobë prej njëzet (20) Euro deri në njëqind (100) Euro, dënohet për kundërvajtje shtetasi:
 - 2.1. i cili nuk e ka letërnjoftimin e vlefshëm.
 - 2.2. i cili me kërkesën e personit zyrtar, të autorizuar me ligj, letërnjoftimin nuk e posedon me vete, ose nuk dëshiron ta jap për identifikim sipas paragrafit 1 të nenit 4 të këtij ligji;
 - 2.3. i cili letërnjoftimin e tij e jep apo huazon personit tjetër për përdorim ose përdor letërnjoftimin e huaj si të vetin, paragrafit 2 dhe 3 i nenit 4 të këtij ligji;
 - 2.4. përdor letërnjoftimin në kundërshtim me paragrafin 1 të nenit 21 të këtij ligji;
 - 2.5. i cili ka më shumë se një letërnjoftim të vlefshëm, sipas nenit 11 të këtij ligji;

KAPITULLI VIII DISPOZITAT KALIMTARE DHE PËRFUNDIMTARE

Neni 23 Të hyrat që realizohen nga ky ligj

Të gjitha të hyrat që realizohen me zbatimin e këtij ligji derdhen në buxhetin e Republikës së Kosovës.

Neni 24 Nxjerrja e akteve nënligjore

1. Për zbatimin e këtij ligji do të nxirren aktet e mëposhtme nënligjore në afatin kohor brenda gjashtë (6) muajsh nga hyrja në fuqi e këtij ligji.

2. Ministri nxjerr aktet nënligjore për:

2.1. procedurat për pajisje me letërnjoftim;

2.2. forma dhe mënyra e punimit të letërnjoftimit.

2.3. çështjet që kanë të bëjnë me autoritetin certifikues dhe autorizimet e ofruesve të shërbimeve;

3. Për zbatimin e këtij ligji Ministri mund të nxjerrë edhe akte të tjera nënligjore.

Neni 25 Shfuqizimi

Me hyrjen në fuqi të këtij ligji shfuqizohet Ligji Nr.03/L-099 për Letërnjoftimin dhe Ligji Nr.04/L-126 për Ndryshimin dhe Plotsimin e Ligjit Nr.03/L-099 për Letërnjoftimin.

Neni 26 Hyrja në fuqi

Ky ligj hyn në fuqi pesëmbëdhjetë (15) ditë pas publikimit në Gazetën Zyrtare të Republikës së Kosovës.

**Ligji Nr. 05/L -015
30 nëntor 2015**

Kryetari i Kuvendit të Republikës së Kosovës,

Kadri VESELI